



Sesida dals

26 d'avrigl 2022

Communitgà ils

28 d'avrigl 2022

Protocol nr.

370/2022

### **Incumbensa Wilhelm**

concernent ina purschida decentrala per registrar datas biometricas cun l'intent da reducir l'administraziun, ils custs ed il traffic nunnecessari en il chantun

### **Resposta da la Regenza**

Dapi l'onn 2010 vegnan las datas per ils passaports svizzers e per part er per las cartas d'identitad registradas en ils dus centers da documents d'identitad a Cuira ed a Zernez. Las burgaisas ed ils burgais dal M han la pussaivladad da dumandar in passaport u ina carta d'identitad a Bellinzona. Per quest intent exista ina cuvegna cun il chantun Tessin. Questa cuvegna è vegnida extendida pli tard sin las legitimaziuns da persunas estras che derivan da terzs stadis. Ina soluziun correspundenta per las burgaisas ed ils burgais dals pajais da la UE/AECL vegn actualmain sclerida.

Tras las novas prescripziuns federalas vegnan tut ils documents da legitimaziun da persunas estras producids dapi la stad 2021 (introducziun en etappas dapi il cumenzament da l'onn 2019) en il format da carta da credit. Las persunas estras ston perquai laschar registrar la fotografia e la suttascripziun (ma senza impronta digitala) en ils centers da documents d'identitad. Questas datas restan valaivlas durant 5 onns per prolongar u per remplazzar ils documents d'identitad. Las persunas estras ston pia ir maximalmain mintga 5 onns a registrar las datas en in center da documents d'identitad, Svizras e Svizzers mintga 10 onns. La gronda part da las possessuras e dals possessurs d'ina permissiun B e C (ca. 45 000) ston dentant laschar registrar las datas mo mintga autra giada ch'ellas ston prolongar la permissiun, sch'ellas ed els inoltreschan ad ura la dumonda da prolungaziun. Pia ston questas persunas, sco las Svizras ed ils Svizzers, ir mo mintga 10 onns en in center da documents d'identitad.

Ils ultims onns èn vegnids producids mintga onn tranter 6000 e 12 000 passaports e tranter 16 000 e 18 000 cartas d'identitad. Il dumber da passaports producids varie-scha pervia da las midadas respectivas en las leschas ch'als pertutgan. L'onn 2019

han ils custs importà circa 2,23 milliuns francs ed il retgav circa 1,68 milliuns francs. La perdita è stada var 550 000 francs. Circa 300 000 francs fin 330 000 francs da questa perdita resultan mintga onn en il center da documents d'identidad a Zernez. Cunquai ch'ins na dastga betg incassar taxas per registrar datas en il champ d'applicaziun da la Cunvegna davart la libra circulaziun, na pon ils custs supplementars che resultan tras questa registraziun betg vegnir adossads ad insatgi. Il pretsch d'in document da legitimaziun da persunas estras s'orientescha al pretsch da la carta d'identidad svizra. Perquai vegn il deficit probablmain plitgusch a s'augmentar durant ils proxims onns. Pervia da la pandemia n'èn ils onns 2020 e 2021 betg vegnids resguardads concernent ils documents d'identidad. Las pussaivladads da viagiar eran restrenschidas per part massivamain e perquai hai er dà damain dumondas per documents d'identidad.

La Regenza suppona ch'i vegnian registradas anc circa 10 000 fin 15 000 persunas estras per onn sunter l'emprima gronda midada dal document sin palpieri al format da carta da credit. Il fatg decisiv en connex cun ils dumbers vegn ad esser ch'i resultan culminaziuns massivas en il sector dals documents d'identidad svizzers pervia dals temps da vacanzas e cunzunt en il sector dals documents d'identidad da persunas estras pervia da l'economia stagionala (p.ex. durant il december). Da l'autra vart vegni a dar mais, durant ils quals vegnan inoltradas per regla fitg paucas dumondas. Sche e co che la purschida decentrala per registrar datas biometricas po vegnir extendida en moda effizienta cun quest volumen (p.ex. cun ulteriurs centers da documents d'identidad u cun autras furmas da registraziun decentrala), vegn a mussar l'examinaziun da la purschida.

Sa basond sin questas explicaziuns propona la Regenza al Cussegl grond da midar questa incumbensa sco suonda:

Il chantun eruescha pussaivladads, co ch'ins po garantir ina purschida pli decentrala per registrar datas biometricas en il chantun Grischun. Sch'i sa tracta d'instituir novs centers da documents d'identidad, sa coordinescha el per quest intent cun vischnancas che han ina buna posiziun strategica.



En num da la Regenza

Il president:

Marcus Caduff

Il chancelier:

Daniel Spadin